

Entrevista exclusivo cu Padu del Caribe..

"RUFO WEVER A INSPIRA MI PA TOCA PIANO"...

Pa: Jan Poets.

** Tambe DEN AMBIENTE a realiza un entrevista exclusivo cu nos querido Tata di Cultura, Don Padu del Caribe, pa asina Padu conta nos e historia di su experencianan cu su gran amigo musico RUFO WEVER (q.e.p.d.), kende hunto cu Padu ta CO-AUTORNAN di nos glorioso HIMNO NACIONAL "ARUBA DUSHI TERA".

"Rufo Wever ta un genio musical", tabata e prome palabranan cu Padu del Caribe a expresa na DEN AMBIENTE. Padu ta sigui: Rufo Wever ta un genio cu mi por bisa cu ta mi inspiracion tambe. Rufo Wever no solamente tabata un genio musical, kende tabata ser concidera como un di e mihor pianista den e area di Caribe, pero den e temponan ey, Rufo tabata e unico persona cu aki na Aruba y Antillas, cu por a hinca pieza riba cilindernan pa caha di orgel.

Padu ta splica cu hasta tabata bin cahanan di orgel for di Curacao te na Aruba, pa Rufo Wever por a hinca pieza den nan.

Trabao pa hinca pieza di cilindernan den un caha di orgel no tabata nada facil segun Padu, ya cu esaki tabata un arte cu tabata requeri Rufo pa traha cu mas o menos seis pa ocho mil clabo ariba un solo cilindernan.

"Rufo Wever tabata ser yuda pa un famia di dje pa traha cu e clabonan, debi cu Rufo Wever a perde su braza robez den un lamentable accidente di auto", un Padu sumamente tristo ta relata.

Padu den un forma conmevador ta relata e lamentable accidente automobilistico cu a

kita e braza robez for di su gran amigo genio musical, cu kende conhuntamente a sabi di produci nos glorioso Himno Nacional.

Padu ta conta: Tabata riba un

durante tempo di guerra, cu biniendo for di San Nicolas e auto maneha pa su amigo Prins Habibe (q.e.p.d.) a ser gedal pa un truck grandi di e marinier-nan cu tabata bayendo pa San



15 di December na aña 1941

Nicolas. Den e lamentable accidente aki Prins su braza robez a worde ranca completamente y a fallece al instante".

"Rufo Wever a haya asina tanto sla na su braza robez, cu luego esaki mester a ser apunta", Padu den un voz solem ta finalisa e parti tristo aki.

Padu ta sigui lamenta: E lamentable accidente automobilistico aki, a shock henter Aruba profundamente, ya cu Rufo Wever tabata un musico masha queri y respeta tanto aki na Aruba como den exterior".

"Tur hende incluso Rufo mes a pensa cu esaki tabata su fin di su carrera como pianista y cu hamas e por mishi cu su dedenan magico riba e teclanan di su piano".

Nos Tata di Cultura ta continua: Pero Rufo Wever su amor pa musica tabata asina grandi y cu su fe den DIOS e la bin laga traha un braza artificial". "Pero a tume un tempo si pa e bin custumbra pa toca piano cu e braza artificial, cual tabata un otro episodio di sacrificio cu a requeri su persona hopi pasenshi".

"Pero tin un dicho ta bisa, cu

"Penado no ta pena pa largo" y asina ta tambe cu porfin su gran admiradornan por a bolbe disfruta di mira Rufo tras di su piano riba pantalla di television durante su show", Padu ta termina.

CON PADU A CONOCE RUFO.

Riba e pregunta di DEN AMBIENTE, con Padu Lampe a sera conoci cu Rufo Wever, Padu a tuma tur su santo pasenshi pa trasporta su mes bek den e grato memoria cu a hibe te na su 8 aña di edad.

Padu na palabra: Tabata tempo cu mi tabata un mucha di 8 aña y Rufo tabatin 11 aña, mi a bin sera conoci cu Rufo na momento cu mi tabata scucha un melodia bunita cu tabata sali for di un piano toca masha profesionalmente banda di mi cas den Nasastraat awor Caya Betico Croes. Tabata den oranan di anochi y mi a bay para dilanti di e bentana di e cas na unda mi tabata mira un mucha chiquito tabata basha poco pieza masha bon mes for di e piano y mi a pontra e hendenan cu tambe tabata para rond di mi, ta ken e mucha ey cu ta toca un piano asina bon ta ? Nan di cu mi cu esaki ta Rufo no...bo no conoce Rufo?...e ora ey Padu a bisa...ta e mucha ey ta Rufo...ahh si mi a yega di tende hopi di dje...pero nunca mi a mire personalmente".

"Na e momento ey mi a wordo inspira pa Rufo pa toca piano, pasobra e tempo ey mi tabata toca hunto cu mi defunto tata, kende tabata un bon pianista y mi tabata toca clarinet, mandolin y cuarto, pero Rufo Wever a duna mi asina tanto smaak pa toca piano cu mi a legumai di toca e otro instrumentnan y asina ey mi a wordo encurasha pa Rufo pa cuminsa toca piano", Padu ta afirma.

Padu ta sigui conta: Dje padilanti mi a cuminsa sera amistad cu Rufo. Mi tabata bay serca dje na su cas pa mire toca, pasobra mi tabata loco pa mira Rufo toca piano y asina ey nos amistad a cuminsa ta crece".

E amistad entre Padu del Caribe y Rufo Wever (den feliz memoria) a crece asina tanto, cu e bunita amistad musical aki a bin logra di produci nos glorioso Himno Nacional, cual nos por a lesa mas extenso riba e dos paginan 24 y 25 den e edicion especial aki durante un entrevista cu Padu, con Padu y Rufo a bin na e historico iniciativa pa traha e cancion "Aruba Dushi Tera" cu despues a bin ser proclama como e cancion cu ta representa nos SIMBOLONAN di UNION y IDENTIDAD, nos BANDERA y ESCUDO y nos GLORIOSO HIMNO NACIONAL.

Rufo Wever (q.e.p.d.) a fallece dia 30 di December na aña 1977, net na momento cu na Santa Cruz un multitud tabata presencia e festival di Dande, cual evento tabata ser concidera como e acto cultural mas grandi na Aruba.

Rufo Wever tabata ser concidera como e REY DI NOS CULTURA, mientras Padu del Caribe ta ser concidera como TATA DI NOS CULTURA.

Awe Rufo Wever no ta hunto cu nos mas, pero semper su nomber lo keda graba y recorda como CO-AUTOR di nos glorioso HIMNO NACIONAL... "ARUBA DUSHI TERA, NOS BARANCA TAN STIMA, NOS AMOR PA BO TA ASINA GRANDI, CU NO TIN NADA PA KIBRE".

Cu Rufo Wever SOSEGA NA PAZ.

Ogden Aruba

Pabien Pueblo di Aruba

cu nos 20 aña di nos Himno y Bandera
y 10 Aña di Status Aparte

RE/MAX
Out in Front.

Pabien Pueblo di Aruba

cu nos 20 aña di nos Himno y Bandera
y 10 Aña di Status Aparte